

四庫全書

史部

# 欽定四庫全書

史部

景定建康志卷

首至二

詳校官監察御史臣沈孫璉

檢討臣德生覆勘

總校官檢討臣何思鈞

校對官中書臣張曾炳

謄錄監生臣陳燦

欽定四庫全書

史部十一

景定建康志

地理類三

都會郡縣之屬

提要

臣等謹案景定建康志五十卷宋周應合撰

應合武寧人自號溪園先生舉淳祐間進士官至實錄院修撰以上章劾賈似道謫饒州通判是書乃其以承直郎差充江南東路安撫司幹辦公事時所作也宋自南渡後建行

宮於金陵改為建康府高宗嘗駐蹕其地設江南東路安撫司以治之為沿江重鎮乾道慶元時屢輯地志而記載尚多闕畧景定中寶章閣學士江東安撫使知建康府馬光祖始屬應合取舊志重加刪定增入慶元以後之事正訛補缺別編成書凡分疆域山川城闕官守儒學文籍武衛田賦風土祠祀等十類援據該洽條理詳明凡所考辨俱見典覈



如論丹陽之名本出建業論六朝揚州常治  
建業後始為廣陵一郡之名論金陵埋金之  
說為驅人鑿山之術皆極精確可據洵地志  
之有體要者也明嘉靖萬厯間是書尚有刊  
本在南京國子監見黃佐南雍志中然所存  
板止七百五十九面則亦已闕佚不全其後  
流傳遂絕朱彝尊曝書亭集有是書跋稱周  
在浚嘗語以曾親是書闕本訪之三十年未

得後始從曹寅處借歸錄之蓋亦罕觀之本  
矣乾隆四十六年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

景定建康志卷首

原序

郡有志即成周職方氏之所掌豈徒辨其山林川澤都鄙之名物而已天時驗於歲月災祥之書地利明於形勢險要之設人文著於衣冠禮樂風俗之臧否忠孝節義表人材也版籍登耗考民力也甲兵堅瑕討軍實也政教修廢察吏治也古今是非得失之迹垂勸鑒也夫

如是然後有補於世郡皆然況陪都乎昔忠定李公嘗  
言天下形勝關中為上建康次之自楚秦以來皆言王  
氣所在句踐城之六朝都之隋唐而後為州為府為節  
鎮為行臺五季僭偽睨消實開吾宋混一之基南渡中  
興此為根本章往考來圖志宜詳於他郡而乾道有舊  
志慶元有續志皆畧而未脩觀者病之慶元迄今逾六  
十年未有續此筆者寶祐丁巳光祖蒙恩來司留鑰因  
閱前志編摩在念一年而勤民二年而整軍三年而易

聞荊州未暇也已未重來汲汲守禦補尺籍治戰艦備  
器械固城池日不暇給未幾鼓柁驚濤風餐露馳於舒  
靳江黃之間往復無慮數四元勲振旅長江肅清光祖  
始得以休于郡興滯補弊之餘爰及斯文有幕客周君  
應合博物洽聞學力充瞻舊嘗為江陵志紀載有法乃  
以是屬之開書局于郡圃之鍾山閣下相與研古訂今  
定凡例而裒篇帙先為留都錄四卷隆炎創興之盛宮  
城建置之詳與夫雲漢昭回之章皆備錄焉揭為一書

之冠冕其次為地理圖為侯牧表為志為傳合為五十  
卷表起周元王四年越城長干之時以至于今千七百  
載年經類緯曰時曰地曰人曰事類之所由分也志凡  
十一曰疆域二曰山川三曰城闕四曰官守五曰儒學  
六曰文籍七曰武衛八曰田賦九曰風土十曰祠祀傳  
凡十一曰正學二曰孝弟三曰節義四曰忠勲五曰直  
臣六曰治行七曰耆舊八曰隱德九曰儒雅十曰貞女  
大畧備矣始于三月申子成于七月甲子獻之天子王

音嘉焉用不敢闕傳之無窮補其闕遺續其方來則有望於後之君子景定辛酉良月初吉觀文殿學士光祿大夫沿江制置大使知建康軍府事兼管內勸農營田使金華郡開國公食邑三千戶食實封六百戶馬光祖書

進建康志表

臣光祖言鍾阜帝王之宅忝備居留職方土地之圖輒成紀載敬裒竹簡冒微楓宸臣光祖惶懼惶懼頓首頓首竊以紫蓋東南勢雄建業青山表裏景似洛陽吳晉

以來皆號京畿秦楚之間已占王氣洗前日六朝之陋  
肇吾宋萬世之基歷數有歸太陽升而燭火熄神武不  
殺膏澤下而江水清爰重昇州遂開節鎮嘉祐之進大  
國龍飛猶軫於初潛紹興之創新宮馬渡喜逢於再造  
發天作地藏之勝著祖功宗德之隆建邦設都非列城  
之能擬詔今傳後豈鉅典之可虛臣叨佩玉麟密瞻銅  
鳳職在承流而宣化法當章往而攷來閭治八年而重  
臨昌報恩徽之厚圖經三歲則一上敢違令甲之嚴廼



選幙條恪修郡乘揭琅邪而首錄昭弁冕之常尊諸地  
諸邑諸城繼加詮次十表十志十傳序列編摩四八萬  
言皆聚此書千七百稊如指諸掌辨山林川澤之名物  
粹衣冠禮樂之風流善有勸而惡有懲往者過而來者  
續茲蓋伏遇皇帝陛下性明日月道整乾坤帝書九丘  
言九州聖學夙深於稽古天下一日行一遍遠模蓋得  
於傳家運藝祖仁皇高宗之心兼創業中興太平之事  
既徹疆於江表行復竟於關中臣未能刊浯溪之碑且

此效雍州之錄漢光投戈講藝願益恢輿地之披周宣  
備器修車何但美東都之會所有新修景定建康志五  
十卷計四十六冊謹隨表上進以聞臣無任瞻天望聖  
激切屏營之至臣光祖惶懼惶懼頓首頓首謹言景定  
二年八月日觀文殿學士光祿大夫沿江制置大使知  
建康軍府事兼管內勸農營田使江南東路安撫使馬  
步軍都總管行宮留守節制和州無為軍安慶府三郡  
屯田使兼兼淮西總領金華郡開國公食邑三千戶食

實封六百戶臣馬光祖上表

獻皇太子牋

右先祖父以龍盤勝地叨分居守之符鶴禁麗天輒獻職方之乘既先塵於丹扆敢繼徹於青闈光祖惶懼惶懼叩頭叩頭惟建業之名區實仁皇之潛邸前收圖於開寶聰明神武不殺者天後駐蹕於建炎險阻艱難備嘗之矣再造中天之業永垂萬世之基光祖筦鐰才卑晁旒恩大承流宣化敢忘載筆之勤考古訂令庶遂闕

文之備恪遵著令悉上送官茲蓋伏遇皇太子殿下恭  
敬溫文賢聖仁孝行必正道宮中常務於觀書建以元  
良天下咸安於主器凡屬乾坤之內宜周日月之明光  
祖俯效編摩仰裨省覽星重輝海重潤益綿景祚之隆  
車同軌書同文行復輿圖之盛所有新修景定建康志  
四十五冊謹隨牋上獻瞻望宮庭下情無任激切屏營  
之至先祖惶懼惶恐叩頭叩頭謹牋景定二年八月日  
具位馬光祖上牋

景定修志本末開慶己未春三月裕齋先生金華郡公以大制帥再尹留都請于朝以京湖舊幕客周應合充江東安撫使司幹辦公事兼明道書院山長編程子書畢明年六月命饒師于池陽又明年二月趣還建康甲寅應合至自池陽拜公玉麟堂公命之曰建康大都會也自慶元而後圖志未續實大闕典而慶元以前之書紀載甚畧不無舛訛圖志三歲一上法也吾再至此又及三年將成此書而丐歸焉屬筆

于子母遜應合避席曰留都鉅典當屬之大手筆應合淺學謏聞不足以辱隆委敢頓首固辭公曰子嘗修江陵志矣圖辨表志粲然有倫輕車熟路今何辭焉襖節適逢甲子宜以是日開書局于鍾山閣下即葉石林紬書之舊所也速為之及吾未去以前成書可也應合稟命而退時有疾未愈欲少俟調理徐受條教而劄命沓至矣入局修纂謹如甲子之期則請于公曰舊志二百八十板所記止於乾道續志二百

二十板所記止於慶元慶元至今所當續者六十餘年之事不敢略亦不敢廢前志也公曰乾道慶元二志互有詳略而六朝事迹建康實錄參之二志又多不合今當會而一之前志之闕者補之舛者正之慶元以後未書者續之方為全書況前志散漫而無統無地圖以考疆域無年表以考時世古今人物不可泯者行事之可為勸戒者詩文之可以發揚者求之皆闕如也子其用江陵志之凡例彙而輯之脩前志

之所未脩此吾所望也應合又請于公曰謹奉教矣而未可以速成也慶元續志之作實因朱舜庸金陵事類之編舜庸郡人也其編猶積二十稔而後成况非郡人者乎况欲合前後而修為全書乎願寬以歲月廣招局官與郡之士友而共成之公不許應合乃條上四事一曰定凡例應合昨修江陵志為圖二十附之以辨其次為表為志為傳為拾遺所載猶不能脩建康又非江陵比也自吳以來國都于此其事固



多於江陵若我朝建隆開寶之平江南天禧之為潜  
邸建炎紹興之建行宮顯謨承烈著在留都鳳闕龍  
章固宜備錄然混於六朝之編列於庶事之目官府  
雜載君臣並紀殊未安也今欲先修留都宮城錄冠  
于書首而建康地圖年表次之十志又次之一曰疆域二曰  
山川三曰城闕四曰官守五曰儒學六曰文籍七曰武衛八曰田賦九曰風土十曰祠祀十傳又  
次之一曰正學二曰孝悌三曰節義四曰忠勲五曰直臣六曰治行七曰耆舊八曰隱德九曰儒雅  
十曰傳之後為拾遺圖之後為地名辨表之緯為四  
貞女

曰時

年世甲子

曰地

疆土分合都邑改更

曰人

牧守更代官制因革

曰事

著成敗得

失之迹以寓勸戒

志之中各著事跡各為考證而古今記詠

各附于所為作之下凡圖表志傳卷首各為一序而  
留都錄之序則請公命筆公皆可之二曰分事任乾  
道舊志慶元續志各有規模今用前凡例會而為一  
慶元以前之未備者慶元以後之未書者皆欲增修  
無闕豈一手兩耳目所能周遍誤承隆委辭不獲命  
何敢自有其事竊惟幕府環列儒宗林立所當博師

三長共成一書金陵故家文獻所聚者舊英俊尤宜  
周詢庶幾憑藉衆力早有成書之期欲乞請官十員  
招士友數人入局同共商確分項修纂公不許三曰  
廣搜訪纂修既欲其備搜訪不厭其詳自幕府以至  
縣鎮等官自寓公以至諸鄉士友自戎帥以至將校  
欲從閩府轉牒取會凡自古及今有一事一物一詩  
一文得於記聞當入圖經者不以早晚不以多寡各  
隨所得批報本局以憑類聚考訂增修其有遠近博

物洽聞之士能記古今事迹有他人所不知者並請具述從學校及諸縣繳申其閥閱子孫能收上世家傳行狀墓誌神道碑及所著書文與先世所得御札勅書名賢往來書牘並請錄副申繳具山巔水涯古今高人逸士有卓行而不求聞達者亦請冥搜詳述以報本局其有聞見最博考證最精者當議優崇諸吏民父老中有能記憶舊聞關於圖志者並許具述實封投櫃櫃置府門三日一開類呈其條具最多而

事迹皆實者當行犒賞公皆從之行牒及榜四曰詳  
叅訂切惟諸司幕府叅佐賓僚學富才宏皆應合所  
願求教然望尊職重有非書局所敢一一屈致者容  
應合每卷修成初藁各以紫袋封傳諸幕悉求是正  
其未當者與未盡者各請批注行間以憑刪修次藁  
再以紫袋傳呈如初俟定本納呈鈞覽仰求筆削然  
後付之鋟梓仍乞選差局吏兩名分管書局事務書  
吏十名謄類草藁書寫板樣客司虞候四名以脩闕

借文籍傳呈書藁等用公皆從之越一月應合又請於公曰成書之期既不可緩修書之事浩若望洋應合自入局以來主一無適夜以繼日疲精書傳極力丹鉛修書之藁未半刻梓之匠已集既同官之難屈非隻手之可辦有長子天驥見為淮西總所催運官欲乞移文總所給假數月專在書局為檢閱校讎之助有壻吳疇見為安豐六安縣主簿亦留總幕乞令往來為助公從之凡纂一事必稟命於公每成一藁

必取正於公夜考古書朝訂今事右分編藁左付刻梓自楔節以來周兩甲子而大略粗備若留都錄四卷地理圖及地名辨一卷年表十卷官守志四卷儒學志五卷文籍志五卷武衛志二卷田賦志二卷古今人表傳三卷拾遺一卷此皆乾道慶元兩志之所無而創為之也若疆域志三卷山川志三卷城闕志三卷祠祀志三卷因前志之所有者十之四增其所無者十之六合為五十卷凡一千六百餘版印標為

二十四冊外目錄一冊上之閩府其書板首尾九百九十四片為厨架五所鑰而藏之紬書堂中選書吏以掌其啓閉每卷每類之末各虛梓以俟續添固未敢以為成書也嘗聞南軒先生因修郡志而示訓曰削去恠妄訂正事實崇厚風俗表章人才是編也於前之八字無能為役於後之八字或庶幾焉雖然金陵自有城邑以至于今千七百年王伯廢興之故山川風景之殊國都城市之變遷田里民物之登耗忠



臣義士之遺烈洪儒騷客之流風衣冠禮樂之隆汙  
典章文物之因革所以興感慨而寓勸戒者豈五十  
卷之圖書所能盡其紀載而兩甲子之日力所能畢  
其編摩也哉姑以奉公之命而不敢怠於其職耳昔  
司馬文正公之修通鑑也粹千三百六十二年之事  
為三百五十四卷之書聚諸賢之助閱十有九年而  
後成猶曰歲月迫趣缺謬不能自保今之所修郡志  
耳既無司馬公之學力又無書局官之衆力且未有

十九年之日力而欲記千七百年之成敗得失於五十卷書之間其為缺謬何可勝言刊而正之姑有望於後之君子云景定辛酉歲七月甲子豫章周應合  
謹書

景定建康志卷首

欽定四庫全書

景定建康志卷一

宋 周應合 撰

大宋中興建康留都錄一

臣先祖恭惟本朝以仁立國聖聖相承用綿億萬世無疆之休普天之下莫非治迹考之建康為尤著粵自藝祖皇帝應天順人肇造區夏江南底定不戮一人廼即南唐故府為昇州治此蓋創業之遠模而至仁之根本也肆于真宗皇帝篤生聖嗣封國于昇尹茲東土府號

江寧其後入繼大統是為仁宗皇帝德侔天地道久化成此蓋太平之盛典而至仁之充周也至我高宗皇帝復受天命再造鴻業翠華南渡首幸江寧廼即府治以建行闕卑宮克儉不忍勞民洋洋聖謨啟佑我後此蓋中興之丕基而至仁之迓續也迨移蹕錢塘世命重臣留守于茲後百三十五年臣疊叨誤恩忝司留鑰人微責重懼弗勝任惟忠惟實圖報萬分凡所以興滯補弊撫軍恤民布宣聖天子之深仁厚澤以固藩籬而護堂

與者一事不敢苟且一刻不敢暇逸力之所至粗無廢  
事惟府志一書尚為闕典雖乾道有舊志慶元有續志  
而紀載踈略不無謬訛自慶元以後六十餘年間未有  
續其書者所部諸郡圖志略備而都會之府獨闕無以  
章往考來非所以隆陪京而脩文獻臣實懼焉矧稽之  
令甲有諸郡圖志三歲一來上之文蓋將以考修廢而  
驗興除也臣之再至歲又及三志而上之茲惟其時於  
是選委官屬臣周應合置書局于府解鍾山閣下相與

考古訂今凡四閱月修纂成書為圖凡十有五

曰龍盤虎踞形

勢圖曰歷代城郭互見圖曰建康府境方括圖曰金陵建閭所部圖圖分上下曰府城圖曰府治圖曰上元縣

圖曰江寧縣圖曰句容縣圖曰溧水縣圖曰溧陽縣圖曰府學圖曰明道書院圖曰青溪先賢堂圖為表

凡千七百年

以侯牧表起周元王十四年

為志凡十

城二曰疆

山川三曰城闕四曰官守五曰儒學六曰文為傳凡三籍七曰武衛八曰田賦九曰風土十曰祠祀

卷而圖之後有辨傳之後有拾遺志之中各著事迹各為考證若圖若辨若表皆舊志所未有而創為之若志若傳因舊志而刪修者十之四增其所無者十之六合

為四十有六卷皆府志也又有大於府志者宮城建置之詳隆炎創興之盛備錄宜也而舊志所載不過數行顧以鳳闕龍章雜書於六朝之編混列於庶司之目甚非臣子尊君之意臣尤懼焉謹於未成府志之先恭修留都錄四卷行宮為卷之一建隆以來詔令為卷之二建炎以來詔令為卷之三御書御製為卷之四又有詔札不獨繫於建康而守臣立石于此者則錄於第四卷末揭為一書之冠冕昭如日星萬目共覩皆知大分之

有常尊留都之有鉅典凡厥庶民是彛是訓以近天子  
之光則於宣德流化未必無小補云景定二年歲次辛  
酉六月吉日觀文殿學士光祿大夫沿江制置大使知  
建康軍府事兼管內勸農營田使江南東路安撫使馬  
步軍都總管行宮留守節制和州無為軍安慶府三郡  
屯田使暫兼淮西總領金華郡開國公食邑二千六百  
戶食實封六百戶臣馬光祖頓首頓首謹書

年月日



行宮記載

開寶七年冬十月藝祖皇帝謂臣曹彬曰南方之事一以委卿切勿暴虐生民務廣威信使自歸順八年十二月彬上露布江南平詔置昇州

天禧二年二月真宗皇帝詔以昇州為江寧府冊命皇太子行江寧尹充建康軍節度使進封昇王

嘉祐四年四月翰林學士臣胡宿言於仁宗皇帝曰陛下建國於昇宜進昇為大國無得封上從之

建炎元年尚書右僕射兼中書侍郎臣李綱言於高宗  
皇帝曰天下形勝關中為上建康次之宜以長安為西  
都建康為東都各命守臣葺城池治宮室積糗糧以備  
臨幸則天下之勢安矣上出其章付中書衛尉少卿臣  
衛膚敏言建康實自古帝都外連江淮內控湖海為東  
南要會之地宜急趣下嚴詔夙期東幸中書舍人臣劉  
珏亦言金陵天險前據大江可以固守廷臣率附其議  
而伯彥潛善主幸東南二年五月上至江寧府駐蹕神霄

宮詔改江寧府為建康府三年閏七月上發建康如浙西  
紹興二年上命江南東路安撫大使臣李光即府舊治  
修為行宮臣光乞增創後殿上許之六月以圖進呈上  
曰但令如州治足矣若止一殿雖用數萬緡亦未為過  
必事事相稱則土木之侈傷財害民何所不至象箸之  
漸不可不戒由是制度簡儉不雕不斲得夏禹卑宮室  
之意六年六月右僕射臣張浚謂東南形勢莫重於建  
康實為中興根本奏請聖駕以秋冬臨幸建康七年三

月辛未上至建康十一月上謂張浚曰朕來建康行宮  
皆因張俊所修之舊不免葺數間小屋為寢處之地當  
與卿觀之初不施丹雘蓋不欲勞人費財也八年正月  
上將還臨安叅知政事臣張守言曰陛下至建康席未  
及煖願少安於此以繫中原之心臣趙鼎持不可壬戌  
上召張俊至宮中諭之曰朕來日東去卿在此無與民  
爭利勿興土木之工俊悚息承命俊見地無磚面再三  
歎息上曰此事非難但艱難之際一切從儉庶少紓民

力朕為人主雖以金玉為飾亦無不可若如此非特一時士大夫之論不以為然後世以朕為何如主也癸亥上發建康戊寅上至臨安府遂定都焉三十二年正月上復至建康二月還臨安初上謂輔臣曰將來幸浙西建康宮宇令有司照管它時復幸免更營造以傷民力趙鼎奏曰即今建康府拘收是年中書門下省言建康府已除行宮留守詔應合行事件並依西京留守司體例施行自是江南東路安撫司常兼留守每歲四季月

準令入宮點視留守司屬官一員從之

行宮規制

行宮在天津橋之北御前諸軍都統制司之南

宮門在宮之南皇城南門之北

寢殿在宮之中

朝殿在寢殿之南

復古殿在寢殿之後

羅木堂在復古殿之後

御膳所在朝殿之左

進食殿在復古殿西南

直筆閣在朝殿之右

內東宮在宮之左南位之右

孝思殿在內東宮之後

資善堂在學士院之右

南位在內東宮之左御苑之右

大射殿在御教場之北

小射殿在復古殿西北

天章閣在皇城門內宮門外東南隅與學士院相對  
學士院在皇城門內宮門外西南隅與天章閣相對  
御教場在軍器庫之南

走馬廊在進食殿之西南隅

御苑在皇城東門之內御馬院之北南位之左

八儼臺在御苑東北

涼館在御教場內

元符間元時敏作記  
今刻石在學士院



高齋在宮之東北隅

慶歷間胡宿作記  
今刻石在學士院

御輦院在天章閣之後

御馬院在皇城司之左

軍器南北兩庫在走馬廊之前

御酒庫在資善堂之右

御醕庫在御酒庫之右

錢物庫在御教場門之右

內侍省在宮之右軍器庫之左

皇城司在天章閣之左

皇城周四里二百六十五步高二丈五尺下濶一丈五尺紹興二年即舊子城基增築

皇城南門正對天津橋御街一直

皇城東門對後軍教場城上有看教樓前有日華橋

皇城西門對江寧縣前大街前有月華橋

東待漏院在皇城門外之左

西待漏院在皇城門外之右

東闕亭在東待漏院之左

西闕亭在西待漏院之右

親事營在東待漏院之左

護龍河分青溪之水自東虹橋下流入河遶皇城東北  
西之三隅至西虹橋下與青溪水復合為一

行宮留守

紹興八年以來被命留守者自臣章誼始以江南東路  
安撫大使兼領後者因之或為留守或為主管留守司

公事

章誼

紹興八年二月以端明殿學士安撫大使兼行  
官留守司公事

葉夢得

紹興八年六月以資政殿學士安撫制置大  
使兼行官留守司公事

孟忠厚

紹興十三年正月以少傅節度使信安郡王  
安撫制置大使兼行官留守司公事

張守

紹興十四年正月以資政殿大學士安撫制置  
大使兼行官留守司公事

晁謙之

紹興十五年四月以敷文閣直學士安撫使  
兼行官留守司公事

鄭滋

紹興十八年五月以顯謨閣學士安撫使兼行  
官留守司公事

俞侯

紹興十九年四月以敷文閣直學士安撫使兼  
行官留守司公事

王昀

紹興十九年十二月以直秘閣安撫使兼行宮留守司公事

楊愿

紹興二十二年四月以資政殿學士安撫使兼行宮留守司公事

王循友

紹興二十三年二月以朝散郎主管安撫司公事兼行宮留守司公事

宋貺

紹興二十四年五月以敷文閣直學士安撫使兼行宮留守司公事

張燾

紹興二十六年二月以寶文閣學士安撫使兼行宮留守司公事

韓仲通

紹興二十九年六月以敷文閣學士安撫使兼行宮留守司公事

王綸

紹興三十一年三月以資政殿大學士安撫使兼行宮留守司公事

張燾

紹興三十一年十月以資政殿學士安撫使兼行宮留守司公事

張浚

紹興三十一年十二月以特進觀文殿大學士安撫使兼行宮留守司公事

陳俊卿

紹興三十二年八月以中書舍人安撫使兼行宮留守司公事

陳之茂

隆興元年五月以直徽猷閣主管安撫司公事兼行宮留守司公事

張孝祥

隆興二年三月以敷文閣待制安撫使兼行宮留守司公事

呂擢

隆興二年十一月以直徽猷閣主管安撫司公事兼行宮留守司公事

汪澈

乾道元年二月以端明殿學士安撫使兼行宮留守司公事

王佐

乾道元年十月以直寶文閣主管安撫司公事兼行宮留守司公事

陳之茂

乾道二年八月以徽猷閣直學士安撫使兼行宮留守司公事

方滋

乾道二年十月以敷文閣待制安撫使兼行宮留守司公事

史正志

乾道三年九月以集英殿修撰安撫使兼行宮留守司公事

唐瑒

乾道六年三月以秘閣修撰主管安撫司公事兼行宮留守司公事

洪遵

乾道七年六月以端明殿學士安撫使兼行宮留守

葉衡

淳熙元年正月以敷文閣學士安撫使兼行宮留守司公事

胡元質

淳熙元年五月以朝議大夫安撫使兼行宮留守司公事

劉珙

淳熙二年三月以資政殿大學士安撫使兼行宮留守

陳俊卿

淳熙五年十月以特進觀文殿大學士安撫使兼行宮留守

范成大

淳熙八年四月以端明殿學士安撫使兼行宮留守

錢良臣

淳熙十年九月以端明殿學士安撫使兼行宮留守

章森

淳熙十五年八月以朝散大夫安撫使兼行宮留守

余端禮

紹熙二年二月以煥章閣學士安撫使兼行宮留守

鄭僑

紹熙四年七月以顯謨閣學士安撫使兼行宮留守

張均

慶元元年正月以寶文閣學士安撫使兼行宮留守司公事

趙彥逾

慶元三年五月以資政殿學士安撫使兼行宮留守司公事

錢象祖

慶元四年十二月以華文閣學士安撫使兼行宮留守司公事



吳琚

慶元六年閏二月以鎮安軍節度使開府儀同三司安撫使兼行宮留守

李沐

嘉泰二年十二月以徽猷閣學士安撫使兼行宮留守司公事

丘室

嘉泰四年四月以敷文閣學士安撫使兼行宮留守司公事

葉適

開禧二年六月以朝請大夫安撫使兼行宮留守司公事

徐誼

開禧三年九月以朝散大夫安撫使兼行宮留守司公事

丘室

開禧三年十二月以資政殿學士安撫使兼行宮留守

何澹

嘉定元年八月以觀文殿學士安撫使兼行宮留守

楊輔

嘉定二年八月以龍圖閣學士安撫使兼行宮留守司公事

黃度

嘉定三年正月以朝請大夫安撫使兼行宮留

守司公事

劉渠

嘉定六年正月以朝議大夫安撫使兼行宮留

守司公事

李大東

嘉定八年十一月以朝請大夫主管安撫制

置司公事兼行宮留守司公事

李珏

嘉定十年二月以寶謨閣學士安撫使兼行宮

留守司公事

李大東

嘉定十二年七月以中奉大夫安撫使兼行

宮留守司公事

余嶸

嘉定十五年十月以朝議大夫安撫使兼行宮

留守司公事

丘壽邁

寶慶元年正月以朝議大夫安撫使兼行宮

留守司公事

趙善湘

寶慶三年二月以中奉大夫安撫使兼行宮

留守司公事

李壽朋

紹定六年七月以朝議大夫安撫使兼主管行宮留守司公事

陳韓

端平元年十月以朝請大夫安撫使兼行宮留守

別之傑

嘉熙二年正月以朝請大夫安撫使兼行宮留守

杜杲

淳祐二年四月以華文閣學士安撫使兼行宮留守

董槐

淳祐四年四月以朝奉大夫安撫使兼行宮留守

趙以夫

淳祐五年六月以中奉大夫安撫使兼行宮留守

趙葵

淳祐七年六月以樞密使叅知政事督視軍馬兼安撫使兼行宮留守

吳淵

淳祐九年二月以端明殿學士安撫使兼行宮留守

王埜

淳祐十二年二月以寶章閣直學士安撫使兼行宮留守

丘岳

寶祐三年三月以寶文閣直學士安撫使兼行宮留守

馬光祖

寶祐三年八月以寶章閣直學士安撫使兼行宮留守

趙與憲

寶祐六年二月以觀文殿學士安撫使兼行宮留守

馬光祖

開慶元年四月以資政殿學士再為安撫使兼行宮留守

行宮匙鑰司

內侍一員掌之

廨舍在西闕亭之右

屬官三員

一員幹辦行宮大內八作司

一員幹辦行宮大內事務

一員監行宮大內門幹辦事務

守把雜役

親事官二十四人係行在皇城司差到看管殿宇

守把皇城門

八作司二百五十人專備修造工役

防守軍兵係於建康府諸軍差撥

養種園一所在城東一里餘中為正堂北向正堂東南為杏堂東北為百花堂東為砌臺西為梅堂西北為竹

間亭乾道三年建

並係北鑰司  
無掌啟閉

景定三年留守臣姚希得奉旨修葺行宮準差承信郎內轄司提舉鮑體仁到府檢計合修去處曰寢殿曰朝殿曰復古殿曰進食殿曰大射殿曰小殿子曰御膳所曰東待漏院曰學士院曰天章閣曰山子閣曰入內內侍省曰射弓亭曰小射堂曰會通門曰會茶亭曰東華

門曰內藏庫曰櫓積庫曰皇城門裏外曰宮門曰西班  
房曰皇城司備屋曰東西闕亭曰走馬廊曰山子堂共  
二十六處其諸殿透換梁棟須使巨材多方經營以供  
其用自當年六月興工入冬暫歇又自四年四月續次  
興作至八月畢工除朝廷科撥到一十萬貫外本府計  
增用一十一萬五千四百餘緡米四百二十三石事訖  
聞奏準苑使李忠輔傳奉聖旨行宮修葺頗夥賜臣一  
千兩鍍金香合一具龍涎香一百餅纈羅二十疋揀芽

小龍茶四斤清馥香三十貼併賜監修官通判臣馮端  
亮纈羅香茶有差

景定五年留守馬光祖任內重修養種園 行宮養種

園在東門外一里而近舊以內臣掌宮務園廢不治景  
定甲子冬始詔留守司無任其事節冗約浮挾姦剔蠹  
居亡何課入倍昔乃斥其羨經營此園雜草鋤荆宣湮  
遠壅規模固在也爰即舊宇撤而新之矢棘輦飛丹雘  
炫耀凡為堂四為序三為臺一門閭神宇暨守視庖湑



之所莫不備具繚以脩垣四百七十餘丈僅再晷鉅竹  
如雲梅杏松桂脫斧斤而就培植清陰周匝始有禁籞  
氣象董是役者江東安撫司叅議官潘大臨凡糜錢一  
萬一千三百貫有奇米一百八十八石有奇

正堂名熙春計一十一間 梅堂名玉雪計八間

四面堂名面面雲山計二十八間 杏堂名清華計

九間 牡丹亭名懷洛計九間 百花亭名芳潤計

八間

景定建康志卷一

欽定四庫全書

景定建康志卷二

宋 周應合 撰

留都錄二

建隆以來詔令

建隆元年賜江南國主書朕奮發側微經綸草昧削平  
多壘輔翊前朝唯堅金石之心用保河山之誓歷事三  
主于茲十年洎世宗上僊少帝嗣位仰承顧命敢怠初  
心屬并寇之幸災結匈奴而入鄙尋奉專征之命方圖

却敵之功豈謂師次郊圻變生倉卒人心所屬天命有歸競列干戈逼趨京闕千夫之長不息於權呼三事之臣共伸於推戴勉從禪讓若墜冰淵非不能致命捐軀蓋無益於周之宗社矣國主雄材奕葉武畧守邦撫吳楚之全封紹揚徐之舊業備觀興替深識變通共保懽盟永安疲瘵遠惟英晤當鑒誠懷

正月

二年答江南李煜手表朕以江南舊邦世有令德承襲基業保乂黎元而能遠奉中朝克遵禮命備見奉先之志用

嘉述職之誠言念忠純方深延納載披手翰彌慰朕懷  
賜李煜嗣位禮物詔睠彼江左世撫舊邦積善降祥聿  
生令器國主知奉先之道傾事大之心克稟貽謀紹光  
奕葉嗣位允符於衆望為邦果契於永圖遐傾附內之  
心益洽同文之化屬新承於基構宜特沛於朝恩專命  
近臣往申慶賜今遣樞密承旨王仁贍賜國主禮物具  
如別錄

十月

三年諭李煜詔朕撫寧寰宇愛育黎元每思致理之方

務在從人之欲今據橫海飛江水鬪懷順諸指揮員寮  
節級兵士各稱有骨肉見在江南乞取歸京國主素推  
仁愛必念流離可令所司分析軍兵憐其割愛悉遣過

江體子馭遠之懷庶叶同文之化

戊午五月

四年賜李煜詔杜廷望至為先令具延詠傳宣令發遣  
顯德二年後隔過朝廷員寮兵士及揚州戶口都過江  
北所有將率一二十人不免恐懼只希年歲間番次發  
遣其揚州戶口見括勘相次起遣過江北事朕為萬邦

之君慮一物失所俾慰丘園之戀免傷霸旅之情今覽

數陳備知識款載惟傾順嘉歎良多

八月戊子

又諭李煜泉州陳洪進遣軍將魏仁濟上言四月二十  
二日據將吏等狀以張漢思不卹軍民勒歸私第請洪  
進鎮撫連城恭聽朝命朕以泉南一境早順大朝遠傾  
拱極之心不絕充庭之貢自前附庸江左阻越中原屢  
有兇徒改易主帥蓋節制之無術致士庶之不寧今洪  
進洞識機宜深明去就勵丹衷而上表越滄海以來賓

朕撫御華夷理須延納所期遐裔皆遂樂康若此後不  
稟朝章輒陵主將當徵鉞旅往討不恭載惟明達之心  
必體懷柔之意

十一月  
丁巳

乾德元年答李煜詔朕推恩馭遠稽古臨朝念秦漢以  
來久絕附庸之制閩越之地素為藩服之封頃者阻限  
中原依憑江左帥臣屢易軍鎮不寧陳洪進為衆所推  
上章聽命頃班詔爵用慰遠人將降制書明諭朝旨國  
主爰形奏牘深述事宜雖認恭勤諒難俞允苟依所請



是朕食言則洪進一心未省為臣之所泉南二郡獨作  
無告之民上為人君安忍行此不移前詔當體予懷

二十

月

又答李煜詔王者之禮諸侯也異姓謂之叔舅詔書賜  
之不名載乎禮文見之史冊顧惟涼德慨慕前王矧彼  
大邦宜加異數國主禮存事上義執勞謙請呼君前之  
名誠為忠順俯同臣下之制何辨等威難議允俞良深

嘉嘆

十二月

二年答李煜詔所上表謝示諭泉南等州事者惟彼二  
州甚為僻遠爰從近歲繼有變更初從効淪亡不能傳  
嗣漢思愚蔽又失衆心陳洪進為下所推尋來請命朕  
雖德薄義在君臨苟爽懷來是虧柔遠且漳南之地夙  
隔海隅終慮遐阻或更生事所宜示以朝命安其物情  
近已特授洪進節麾委以鎮撫推公示信固無私焉在  
予素心應所備悉

二月乙卯

又諭李煜詔朕撫寧邦國愛育黎民欲禮讓之興行期

干戈之偃戢爰自江表內附商旅南通車書雖嘉於混  
同關市每煩於候接其間不無羣小罔顧憲章或尚氣  
以憑陵或使酒而喧競每達朕聰深用憮然雖曾指揮  
尚未嚴肅已降宣命自今諸處不令客旅過江只於江  
北置務折博凡有貨幣但於彼處貿易載惟通晤當體  
睠懷

八月乙未

諭李煜朝覲詔勅李煜爾事我大朝素堅臣節望日展  
傾諭之禮頗盡恭虔凝旒推待遇之恩每從優異金石

卷二  
之心誠雖固丹青之懷抱未伸將欲弭中外之間言莫若敦君臣之厚契苟非會面何以宣心是用專遣廷臣往諭朕旨當體誠意暫覲闕庭佇俟來儀以慰延望故茲示諭想宜知悉

諭江南管內勅榜勅江南管內州縣軍鎮官吏軍人百姓等朕統御萬邦撫臨億兆推至誠而待物期率土以歸心布惠行仁是予本志興兵勤衆非我願為惟彼江南言修臣禮久被撫懷之化頗傾依附之心貢封章則

惟見恭勤修外貌則多從減降既云事大每欲包荒甘  
言常信其赤心內稔豈疑其姦計而又囂傾誠款請降  
冊封既禮分之未虧故我心之無間使人頻至詞旨愈  
專是以特降詔書俾其畧詣京闕外則弭寰區之宅論  
內則盡魚水之深情終日包藏一旦彰露不唯多方託  
故懇避來朝而乃修葺城池選練軍旅教習戰陣抽點  
鄉兵為拒捍之計謀作攻守之準備朝廷養寇垂二十  
年心狠貌恭突然自敗向展為臣之禮都為觀豐之方

每云傾輸盡彰狡詐復念一方生聚積歲誅求奉其矯  
偽之心成彼瘡痍之苦中外士庶請余討除縱朕心獨  
欲舍容奈衆議皆懷憤悻既行問罪須至興師今者禁  
衛出軍雲臺選將授幄中之成算奮堂上之奇兵荆渚  
樓船順流而下餘杭戈甲合勢而趨嶺南則數路齊驅  
湖外則分頭競入水陸兼進左右夾攻絕其飛走之門  
可見覆亡之勢役不再舉其在于茲江南軍人百姓等  
久在偏方阻霑皇化諒達變通之理必知逆順之規應

偽命文武官僚等事於偽邦各懷明識所宜詳觀事勢  
審擇安危本主既終是執迷羣臣須自求多福或能率  
師徒而送款或能舉郡邑以來降俟爾效忠即當行賞  
玉帛官爵我無愛焉以節鎮來歸則便頒節鉞以郡邑  
向化則便賜郡符並令偽命職官各更加等酬獎去危  
得路轉禍有門勿失良時自貽後悔百姓等各安家業  
無至憂驚王師所臨軍法甚峻已指揮諸軍兵士不得  
殺人放火及擄掠人口發掘墳墓必令萬旅不犯秋毫

候收復江南日特放租稅三年所有相次李煜差點到  
百姓刺面配軍人等候收復日並放逐穩便歸農各令  
倍加安恤摧枯拉朽竚成平定之功薄賦輕徭永樂混  
同之化凡爾黎庶各體我懷故茲榜示各令知委

答李煜奏峽口舟船詔勅李煜省所奏峽口有舟船到  
岸事具悉朕思自爾守國今十四年瞻言保護之心著  
在久長之義然於近日繼有間言或云修葺城池或云  
教習舟棹在城則選練軍伍向外則抽點鄉兵又於邊



上收得文字進來備見爾臣密所行意度或言稟奉宣  
旨或則自稱朝廷向所傾輸並云減降如斯機計都自  
罔欺惟朕心誠素無疑問驟茲聞達深用驚嗟而又方  
務包容是以別推恩旨因修國信專遣使臣庶爾暫來  
與吾面會定君臣之厚契釋中外之疑懷兼於公江量  
差兵士俾令巡警免爾憂虞何期峽口經由戍兵排布  
既來邀截須至殺傷兼封到弓箭進呈足明事實爾既  
未來朝覲彼又先起鬪爭向所傳聞茲乃證驗今披所

奏全似執迷豈衆臣蔽固而不知使大義倉皇而遽失  
所言二弟見在朝廷從善則方領雄藩舉家帖泰從鎡  
則見居公館異禮接延日令撫安固無憂懼設若恩意  
減薄何以及斯宜體朕懷以保終始今并收到文帖封  
往故茲詔示想宜知悉

答錢俶進李煜書詔勅錢俶省所奏不拆重封進呈江  
南李煜送到書事具悉卿位冠師壇心傾王室銘鐘鏤  
鼎迺高表率之勲翼子貽孫不墜貞忠之節負上將縱

橫之畧秉大朝征伐之權得外境之來緘具封函而上  
進可明傾竭深副倚毗足觀久大之謀永保山河之寄  
其為嘉賞不捨寐興故茲獎諭想宜知悉

招諭李煜詔勅李煜朕法天臨人開懷恕物每以愛民  
為念未嘗黷武肆情而況待爾之恩素為殊異比期會  
面深欲宣心豈謂未體睦懷惑於疑間致此嬰城之後  
應知失策之由或以為困在危途且無外援攻之則必  
取守之則必亡朕心未然良有以也但念滿城生聚萬

旅攻圍偶誤計於一人致罹殃於兆庶矧惟終始素欲保全邇來雖有差違朕亦為爾體悉却慮方茲隔越未得悔陳許乃自新特頒明旨惟爾衷抱當用沉思豈不知先君墳塋每加保護在京骨肉盡禮接延爾雖疑迷朕無渝變由爾未能開悟致令困彼蒸黎今者覽將帥之上言請梯輦之速進師徒之勢迅若風驅旬月之間必見瓦解將俞所奏寧不軫懷失路之人所宜指示逆流之水用使開通闢茲効順之門協以好生之義失於

此際悔亦難追朕既不能愛彼生靈爾亦何路全其家  
國若能日度一日謀無定謀久長之間如何了奪從鑑  
等先因貢奉來至京師久茲駐泊郵亭盡當體認朝旨  
俾令歸復用達誠懷儻蔽固之能除斯憂危之頻釋君  
臣之分可保如初禍福兩途爾當審擇故茲詔示想宜  
知悉

招諭江南勅榜勅江南人戶等朕君臨萬國子育兆民  
惟思於恤物愛人豈憚於宵衣旰食矧惟江表久隔皇

風竊號偷名盜據其土地急徵厚斂割剝於黎元是興  
弔伐之師往救凋殘之弊捷音繼至我武惟揚盪巢穴  
以非遙混車書而在即百姓等咸居偽俗未被朝恩先  
行告諭之文俾識懷柔之意如能向王師而効順慕皇  
化以傾心即當永保安寧仍令倍與存恤若是潛謀結  
集不認招携便遣分兵剪除必是全家誅戮惟茲禍福  
宜自擇焉特示明文無貽後悔凡爾黎庶體我誠懷故  
茲榜示各令知悉

開寶八年平江南曲赦門下惟彼江南久從割據洎中原之有主奉正朔以投誠朝廷推恩保護尤至而李煜不量力分每縱姦僞詐為事大之恭勤每欲欺天而觀望修葺城壘彌年為固守之方招誘豪強終日有包藏之志顯然彰露達子聽聞猶推以異恩許其入覲堅心背順稱疾不朝向來詐欺一朝俱敗送蠟書則勾連逆寇肆兇徒則刼掠王民問罪之師駐踰周歲朕念一城生聚逃告無門由愚騃之狂迷致民人之塗炭疊令招

諭堅更拒違以致雷電師徒同懷忿怒一舉而孤城自潰臨危則逆豎擒降南方既平萬彙同慶既洽昇平之化宜申曠蕩之恩限赦書到日昧爽以前應江南管内州縣諸色罪人

云云

太陽委照沴氣已平慶此新恩當知朕意

除李煜官制孫皓降晉叔寶入隋咸膺列爵之封悉赦後時之罪茲惟故事可舉而行李煜承累世之遺基據六朝之故地朕奄有天下底定域中苞茅雖貢於王庭



輯瑞不趣於朝會洎偏師問罪銳旅傳城猶冀懷來頗  
聞固拒爾自貽於悔吝余豈忘於哀矜是用盡滌瑕疵  
併推恩渥升帝傳之秩列環衛之班蕪啟侯封式隆寵  
數勉膺休命宜保令圖可光祿大夫檢校太傅右千牛  
衛上將軍封違命侯食邑三百戶

詔建昇州為建康軍江寧府勅朕以祇畏昊穹保寧基  
構荷鴻禧之總集祐丕緒之繇昌眷予宗藩實惟元嗣  
聰和植性務時習以相資孝友惇方尤夙成而有裕爰

稽與頌式舉彝章載增燾土之封彌固維城之業表茲  
南紀允謂與區式示壯猷特崇巨屏宜建昇州為建康

軍江寧府

天禧二年  
二月戊辰

天禧封昇王制王者尊奉宗廟必建於列藩承衛邦家  
允屬於元子所以保定區宇億寧神祇用茂本校聿隆  
天序朕仰膺真祐恭守丕基集鴻瑞之殊尤啟慶源之  
淵邈是用上稽靈意下順羣心爰開寶玉之邦式重盤  
維之寄舉茲公詔誕告多方皇子崇仁保運功臣忠正

軍節度壽州管內觀察處置等使特進檢校太尉兼中  
書令使持節壽州諸軍事行壽州刺史壽春郡王食邑  
三千戶食實封一千三百戶某敦厚慈仁聰明睿智英  
姿體於雲日美德冠於珪璋識達幾微動成乎先見學  
探閭與克顯於生知茂揚為善之風特表問安之喜而  
中外臣庶奏疏洽聞仰譽徽之日新願典章之載舉既  
難謙抑是用俯從六朝與區南夏雄屏建其茅社錫以  
旌旄佐兼帝保之崇階視台儀之重進褒功之懿號增

食采之真封爾其靖共對越成命可開府儀同三司守  
太保兼中書令行江寧尹充建康軍節度管内觀察處  
置等使進封昇王食邑二千戶食實封一千戶賜宣德  
守正功臣勲如故仍令所司擇日備禮冊命

二年二月丁卯

立昇王為皇太子制朕以纂紹慶基寅恭寶命緬懷聖  
緒祇守大倫詳觀方策之書具載典彛之訓古先哲后  
臨御中區何嘗不崇建天枝登隆國本謹玉符之命召  
嚴象輅之威容適及昌期顧茲上嗣欲懋修於三善繫

永正於萬邦爰揆嘉辰誕頒明制皇子崇仁保運宣德  
守正功臣建康軍節度管內觀察處置等使開府儀同  
三司守太保兼中書令行江寧尹上柱國昇王食邑五  
千戶食實封二千三百戶仁宗舊名惠和天賦謹敏夙成發  
自妙年蔚為令器趨紫庭而遵教造丹宸以問安孝本  
因心禮皆中度而自毓英徽於蘭殿進封爵於金壇佐  
以儒臣導之經術春誦之功匪懈日新之德彌高乃眷  
具僚三陳封奏冀陟元良之位用符歷代之文仰法前

星俯從羣辟念宗祊之所賴命七鬯而是司僉議大同  
官占協吉重明貳極不其盛歟可立為皇太子改名宗仁

諱廟

所司擇日備禮冊命大赦天下文武常參官子為父

後見任官者賜勲一轉

二年八月十五日

張士遜罷相知江寧府制入幹萬幾以總代天之職出  
倡九牧以宣美俗之風維時輔弼之賢迭為朝廷之重  
其頒明制以告治庭推忠協謀佐理功臣特進行禮部  
尚書同中書門下平章事集賢殿大學士上柱國清河

郡開國公食邑四千三百戶食實封一千四百戶張士  
遜識用冲深器懷沈遠早從朝路既陪東學之游肆翼  
天飛遂正中階之列秉節在位宣勞有年念經邦務之  
煩庸寄藩符之秩天臺之峻司寇帥於五刑澤國之饒  
秣陵都于一會載更顯序往布寬條於戲君之遇臣要  
始終而盡禮下之報上無出處而或渝允迪乃休以服  
朕命可特授刑部尚書知江寧府兼管內勸農使改賜  
推誠保德翊戴功臣

天聖七年  
二月丙寅

王安石罷相知江寧府制門下入則冠宰路之重百辟之所儀刑出則寄帥垣之尊萬邦之所憲法苟非令德奚稱異恩粵予端揆之臣久托機衡之任錫之寵渥均厥賢勞推忠協謀同德佐理功臣光祿大夫行尚書禮部侍郎同中書門下平章事監修國史上柱國太原郡開國公食邑三千一百戶食實封八百戶王安石稟明哲之姿蹈柔嘉之則學問淵博為時儒者之宗議論堅明有古直臣之烈咨疇偉望升冠近司憂勤百為夷險



一節方藉壯猷之助且觀盛化之流遽上封章願還政  
事確誠莫奪茂典載加正位天官之聯升華殿幄之侍  
仍加賦邑以重藩維於戲納忠告猷卿所素尚尊德樂  
道朕豈敢忘毋怠乃心而不予輔可特授行吏部尚書  
觀文殿大學士知江寧軍府事兼管內觀農使兼江南  
東路屯駐駐泊兵馬鈐轄加食邑一千戶食實封四百  
戶改賜推誠保德崇仁翊戴功臣

熙寧七年  
四月丙戌

王安石自江寧府拜昭文相制門下乾健坤順二氣合

而萬物通君明臣良一德同而百度正眷予元老時廼  
真儒若礪與舟世莫先於汝作有衮及繡人久佇於公  
歸起升冢席之崇播告路朝之聽推誠保德崇仁翊戴  
功臣觀文殿大學士特進行吏部尚書知江寧府上柱  
國太原郡開國公食邑四千六百戶食實封一千二百  
戶王安石信厚而簡重敦大而高明潛於心神馳天人  
之極摯尊厥德性沂道義之深源延登傑才裨參魁柄  
傳經以謀王體考古而起治功訓齊多方新美萬事爾

則許國予惟知人讒諛稽天孰斧斨之敢缺忠氣貫日  
雖金石而自開向厭機衡之煩出宣屏翰之寄遽周歲  
歷殊拂師瞻宜還冠於宰司以大釐於邦采兼華上館  
衍食本封載更功號之隆用侈台符之峻於戲制天下  
之動爾惟樞柅通天下之志爾惟著龜繫國重輕於乃  
身致民仁壽於當代往服朕命圖成厥終可特授依前  
行吏部尚書同中書門下平章事昭文館大學士兼譯  
經潤文使加食邑一千戶食實封四百戶改賜推忠協

謀同德佐理功臣

熙寧八年  
二月癸酉

王安石罷昭文相再判江寧府制門下入居丞弼用表  
儀於百官出總翰藩將師帥於九牧地雖中外之異體  
亦重輕之均推忠協謀同德佐理功臣特進尚書左僕  
射兼門下侍郎同中書門下平章事昭文館大學士監  
修國史兼譯經潤文使上柱國太原郡開國公食邑六  
十六百戶食實封二千戶王安石得古人之風蘊真儒  
之學眷方深於台輔志彌懋於政經挈持綱維糾正法

度俄屬伯魚之逝遽興王導之悲引疾自陳丐閑斯確  
宜仍宰路之秩載加袞鉞之榮於戲大官大邑以庇身  
建節雖臨於鄉郡嘉謀嘉猷而告后乃心猶在於朝廷  
納忠不忘懷德甚邇可特授檢校太傅依前尚書左僕  
射同中書門下平章事使持節都督洪州諸軍事行洪  
州刺史鎮南軍節度洪州管内觀察處置等使判江寧  
府兼管内勸農使充江南東路兵馬鈐轄加食邑一千  
戶食實封四百戶改賜推誠保德崇仁翊戴功臣

九年九月

午丙

卷二

右二十五制皆大詔令錄前十八制知江南之所以  
平而創業之規著焉錄仁皇初潛封冊三制知昇國  
之所以大而太平之典在焉其後所錄四制則士遜  
安石皆以宰相出守又見江軍之所以重而大臣之  
用捨有所關焉萬年其監于茲臣頓首頓首謹錄

景定建康志卷二

欽定四庫全書

史部

景定建康志卷

三四

詳校官監察御史臣沈孫璉

檢討臣德生覆勘

總校官檢討臣何思鈞

校對官中書臣宋枋遠

謄錄監生臣張泰

欽定四庫全書

景定建康志卷三

宋 周應合 撰

留都錄三

建炎以來詔令

所錄惟大詔令凡宰執使相被命為都督宣撫制置大使及守臣之被特恩而可考者錄之

建炎詔幸江寧府國家厯運中微干戈未弭因時巡省  
蓋順權宜以江寧府王氣龍盤地形繡錯據大江之險  
茲惟用武之邦當六路之衝實有豐財之便將移前蹕  
暫駐大邦外以控制於多方內以經營乎中國尚慮有



司排辦過於奉承百姓追呼疲於道路儻齊民之或擾  
豈非德之敢安將來巡幸緣路州郡及兩浙路江東監  
司江寧府不得分毫騷擾以安人心

三年三月二十八日

詔改江寧府為建康府建康之地古稱名都既前代創  
業之方又仁祖興王之國朕本繇代邸光膺寶圖載惟  
藩潛之名實符建啟之義蓋天人之允屬况形勝之具  
存興邦正議於宏規繼夏不失於舊物其令父老再覩  
漢官之儀亦冀士夫無作楚囚之泣江寧府可改為建

康府其節鎮舊號如故

三年五月八日

制授劉光世江南東路宣撫使建康府置司門下朕觀  
高帝創興王之業亦安能久居於漢中孝文懷良將之  
風則未嘗不在於鉅鹿眷吾當世之傑克繼昔人之賢  
旄袞交輝俾東西而作鎮鼓旗相應庶表裏以濟功載  
洵休辰敷告列位起復寧武寧國軍節度使開府儀同  
三司充兩浙路安撫大使馬步軍都總管兼知鎮江軍  
府事兼管內勸農使彭城郡開國公食邑四千八百戶

食實封二千一百戶劉光世威嚴而持重沉毅而尚謀  
勇冠軍中幼已從於父戰名聞閩外壯自取於侯封屢  
宣入衛之勞茂著勤王之績迨偃藩於京口實扞寇于  
淮濱吳漢在軍隱若敵國李勣護塞賢於長城盡經理  
之百為見忠純之一節幸天心之悔禍屬敵境之按兵  
敢恃小康遽忘遠略臨泗濱而列戍良所重煩撫江左  
以宣威式從改命益資雅望還控上游視黃閣以參華  
仍墨線而從事用加采食昭示邦彛廉藺相歡應體公

家之急賈馮不伐佇觀遠業之成於戲殫廩廩之儲以  
募兵斯欲賴一朝之用極名器之寵而命帥豈其美百  
姓之觀維予一人注意以疇咨與彼萬方勞心而屬望  
爾之責也往其欽哉可特授檢校太傅依前起復寧武  
寧國軍節度使開府儀同三司充江南東路安撫使建  
康府置司加食邑五百戶食實封三百戶封如故主者施  
行

賜劉光世辭免不允詔勅光世省所再上劄子奏辭免

恩命事具悉朕以安危之計寄於二三將帥之臣既命世忠出營淮泗則夫建鄴上游之地非時偉望其孰鎮之惟卿忠誼世濟勲名並高茹痛銜恤起從戎事家讎國患寧忘厥圖發號移屯軍聲益振固已威先萬里之外矣方茲委重宜有寵行顧將相之官已登極品則帝傳之秩姑示褒崇往體眷懷毋煩堅避所請宜不允故茲詔示想宜知悉

賜江東宣撫使劉光世詔勅光世朕惟吳越之區既留

警蹕江淮之險宜植藩籬顧貴池姑孰之津直下蔡歷陽之會接九江之衝要臨建業之上游分宿重兵是資偉望眷予勛舊深體懃虞聞指意以具孚請從移戍馳封章而來上曾靡告勞卿能若斯朕復何慮載嘉恭順深動歎咨惟孝於親則必揚後世之名惟忠於君則當徇公家之義念此中外安危之計屬卿二三將帥之臣情若弟兄毋蓄閼牆之怨義均寮案共輸許國之誠所期戮力以同心用克折衝而禦侮丹青不朽將並列於

雲臺帶礪弗渝亦咸書於盟府乃所望也豈不韙歟已  
除卿江東淮西路宣撫使故茲詔示想宜知悉秋冷卿  
比平安好遣書指不多及

賜建康府路安撫大使呂頤浩乞給假不允詔勅頤浩  
省所奏比因飲食不時遂致胃弱因傷寒變為瘧疾伏  
望俯念衰殘給假將治纔候稍安即兼程起發前去事  
具悉為臣之規固重於進退許國之誼宜徇於安危乃  
眷元臣實勤多難扁舟徑去身雖遠於朝廷魏闕遐瞻

心諒存於王室屬此防秋之急肆先作牧之求素志克伸何恙不已中興江表今復見於夷吾薄伐太原尚有勞於吉甫其趣介圭之覲副茲側席之思所請宜不允仍依累降指揮疾速前來行在奏事訖之任故茲詔示想宜知悉秋熟卿比安好遣書指不多及

賜建康府路安撫大使呂頤浩辭免不允詔勅頤浩省所奏劄子辭免恩命事具悉君子處已以用捨為行藏大臣立朝寄安危於進退卿中辭政柄出擁麾旄閔勞



機務之繁優假真祠之逸惟乃心王室能忘國步之難  
顧無踰老臣用倚帥藩之託賜環趣召弭節來朝蒼生  
之望素高元老之猷益壯垂紳正笏精神端可以折衝  
緩帶輕裘談笑何難於卻敵維吾舊德宜體眷懷勉圖  
克復之功毋徇撓謙之節所請宜不允故茲詔示想宜  
知悉

紹興賜葉夢得辭免安撫大使不允勅書朕惟多事以  
來厥民塗炭大軍之後所至荆榛日求綏馭之良庶復

纂承之舊惟大江襟帶之會實前古國都之餘地關安  
危勢控南北豈獨賴兵民之鎮蓋將期農戰之脩非吾  
耆舊之英孰任倚毗之大爰頒優詔用畀劇權謂與人  
而同憂必不日而引道乃形遜牘殊唏眷懷其趣屆於  
提封以毋勤於軫慮所請宜不允故茲詔示想宜知悉  
秋冷卿比平安好遣書指不多及

賜江南東路安撫大使兼知建康府充壽春府滁濠和  
州無為軍宣撫使李光辭免不允詔勅李光省所奏辭

免恩命事具悉朕惟侍從之賢出入迭用其在朝則矢謨禁闥為心腹之臣在外則折衝大邦膺屏翰之寄時有緩急任隨重輕朕方擢卿從班首冠六聯之長屬建康謀帥所急在茲雖坐執銓衡甚宜其職而宣威方面無以踰卿肆陞祕殿之華以壯長城之託亟祇成命勿事牢辭所請宜不允

賜鎮江建康府宣撫使韓世忠詔勅世忠朕惟時已戒寒守當嚴備循江流而扼險顧力散以難周朕形勝以

宿師則勢專而易應眷昇潤東西之府據江淮南北之衝走集所趨舳艫交會封疆之接雞犬相聞曾無數舍之遙奚假兩軍之重乃命江東之戍更莅池陽遂因京口之屯並臨建鄴仍資威望分控長淮惟卿勇不顧身忠無擇事寬其分部庶能展足以赴功睦乃比鄰尚克同心而濟務念國家之至計緊將相之協恭勉就大勲毋懷小忿譬猶捕鹿要為掎角之圖有若獻豸皆獲公私之利往體朕意佇觀厥成已除卿鎮江建康府淮南

東路宣撫使故茲詔示想宜知悉秋冷卿比平安好遣書指不多及

乾道御札賜知建康府江東安撫使史正志金帶朕以江東方面控制兩淮卿能悉意奉公協濟王事職務振舉朕實嘉之今遣中使甘昇賜卿金帶以示褒勸之意至可領也

五年十一月

賜新除知建康府洪遵詔厥今重鎮莫如秣陵異時謀帥多取政塗之舊非特藉賴威望鎮臨兵民亦惟嘗侍

帷幄知德意志慮之詳焉卿文學政事著于中外當塗  
分守尤號循良寬吾顧憂無易卿者夫繇諸侯而列方  
伯釋銅魚而佩玉麟固足以爲吏士之光矣况乎粉榆  
故鄉近在封部之間哉勉稱恩榮毋煩遜避

七年六月  
十二日

淳熙御札賜知建康府江東安撫使劉珙勅劉珙朕軫  
念元元靡忘宵旰每郡國小有水旱之虞則焦勞惻怛  
惟恐一物之失所非得吾九牧之良憂國如家視民猶  
已飢者推吾此意先事而爲之備安能拯斯民於無事

哉卿以樞機舊臣往釐別都屬竝江諸郡歲適不登而建業為甚乃能前慮卻顧預講荒政或廣儲而賤糶或發廩以勸分或旁糴於荆湘或汎招於商旅凡可以為賑恤之具靡所不至是以穀雖儉而市價不翔田畝雖傷而農人不至於飢餓轉徙今茲多稼新穀已升則斯民遂可以免艱食之患而安有生之樂矣夫豐荒之事所不能無然方民病而後圖與夫先事而為計其利害得失則固有間此趙抃之所以守越蘇軾之所以守杭

皆如是道而朕之所以有取於卿不忘乎嘉歎也故茲  
獎諭想宜知悉秋熱卿比平安好遣書指不多及

賜劉珙辭免不允詔朕深懲守帥之數更遴擇循良而  
久任眷陪都之重地煩宥府之舊人逮此累年底于多  
績召公南國當自適於憩棠裴度北門顧奚妨於卧鎮  
寧容引疾遂欲合符勉思自養之方庸體仰成之意所  
請宜不允

五年閏  
六月

賜知建康府陳俊卿詔大江東西並置連帥其屬任等



耳若乃外控淮甸內屏浙右建牙作牧兼寄留都之管  
籥則於選擇抑又重焉卿蚤傳初潛簡知惟厚久儀宰  
路望實具孚前以從臣攝行帥事凡兵民之利病江山  
之形勝固嘗深思而熟講矣嗣成前績人胥謂宜矧卿  
不憚暑行既開洪府今秋高氣爽舟輿安適造朝之鎮  
乃復告勞乎式遄其驅毋遏朕命所辭宜不允

五年八月十日

紹熙御札賜知建康府江東安撫使章森勅章森省所  
奏劄子創造見管軍兵營屋等事具悉陪都重地

軍籍尤備聯校束伍必有營壘之固而事功創舉  
實資長才卿禁涂之英折符守籥政平訟理民用  
安業乃能以其餘力體國遠慮列楹舊址繕治一  
新夫經畫有方則民不病擾居處既定則士不知  
勞若兵與民均安而亡害且足以儆軍實修武事  
為藩翰經久之計其利溥矣成勞上聞深為嘉歎  
故茲獎諭想宜知悉春暖卿比平安好遣書指不  
多及

除曾從龍督視軍馬制門下朕祇承洪業遠慕駿  
功督江左之軍而國勢張晉賴謝安之畧視淮右  
之師而皇威暢唐資裴度之籌顧采薇治外之孔  
嚴宜烝民任賢之尤急妙簡元樞之望盡提諸將  
之權肆諏剛辰式渙孚號金紫光祿大夫知樞密  
院事兼叅知政事曾從龍學醇而識邃德厚而器  
閎蚤擅兩都之倫魁蔚為三代之王佐炳謀國之  
智先見洞乎著龜勵事君之忠精誠貫乎金石再

踐政塗之峻獨顯宥府之崇一念慮必圖又於邦  
家一訐謨必思安於社稷氣塞乾坤之大志期宇  
宙之清况太乙之神來格久占福曜之臨而甲子  
之厯有開適應初陽之復趣迎善氣特命元戎皇  
天付予有家莫重要衝之守寧王遺我大寶適資  
艱運之扶維文武之全才蘊沉深之大畧就陞使  
領仍衍井畬總表撐裏拓而定規摹合前茅後勁  
而受節度風生草木聲震山川聖策定則有功可

必應兵之勝真儒用而無敵何難勅敵之平注倚  
非輕延登有待於戲義問之拒逆亮收萬全於指顧之  
間張浚之卻偽齊奏三捷於談笑之頃朕方恢於祖烈  
爾宜邁於前修衆思集則精神彊列戍睦則首尾應亟  
菑攘於外侮用勦相於中興可除樞密使督視江淮軍  
馬加食邑食實封

除新知建康府曾從龍叅知政事制勅慶厯之開太平  
范仲淹為參預元祐之新大化呂公著為疑丞朕遵晦

十年厲精一旦趣召先朝之彥俾還近輔之聯誕敷絲綸敷告簪紱資政殿學士新知建康府曾從龍學根乎正大氣抱乎純明其重足以挫衆紛屹然鼎呂其靜足以燭羣動瞭若著龜蚤服在於大僚恥苟同於汙俗不合則去有待而行鶴鳴九臯久聞聲而樂只鳳翔千仞迄覽德以來思予興相見何晚之嗟爾動可為忠言之喜舉昔大對勸今力行嘿有契於此心期共繇於斯道更化則可善治宜增重於本朝折衝何必臨邊奚尚勞

於外服爰輟居留之寄聿嚴共政之圖蒞勅局以提綱  
拓爰田而衍賦併昭異數式獎英猷噫六典建於周家  
莫先乎設參而置輔庶績凝於虞室尤在乎同寅而協  
恭勉殫訐謨之忠共濟垂拱之治可除叅知政事加食  
邑五百戶食實封三百戶

除趙葵督視江淮軍馬制

續兼知建康府江東安撫使行宮留守

門下朕

若稽在昔無競維人南仲往城而玁狁于襄文后所以  
嚴治外之政召虎來旬而淮漢庶定宣王所以成攘夷

之功我有蓋臣夙蘊英略允謂文武兼資之彥久贊東  
西二府之權庸就樞聯陞進使範仍執國政翼宣化原  
茲適會於時艱所當急者兵務用煩戒道俾往視師士  
聽無譁王言作命通奉大夫知樞密院事兼叅知政事  
權監修國史日厯同提舉編修勅令同提舉編修經武  
要略長沙郡開國公食邑三千三百戶食實封六百戶  
趙葵抱開物成務之學富康時經遠之謨識洞幾微得  
知國知兵之要世傳忠孝播有臣有子之詩額經制者



十年盡劬瘁之一節膚公入奏旂常之勲績屢書威譽  
再馳旃裘之君長咸怖出則老熊當道入而猛虎在山  
休名雅似於仲淹勇退直希於若水屬時改紀有詔予  
環甲兵之問至廟堂肆俾分治股肱之寄在忠力未嘗  
辭難種蠡霸越之可期房杜相唐而有待載疇績用趣  
正使端當疆事之未寧而敵情之叵測分數不明而兵  
屯無以統一賞罰不信而士卒無以激昂孰寬顧憂卿  
獨勇往惟氣勢合則可以制勝惟精神運則可以折衝

水陸之備必嚴風寒之護必密兵事不由中御蓋思運  
量之宜廷臣汝擇自從蓋廣忠賢之助實倚長算克濟  
多虞廟論既得以參聞治脉庶幾於融貫並衍邑租之  
入於昭禮貌之隆於戲王導仗黃鉞而督晉師江左賴  
之清宴裴度荷雕戈而執蔡醜淮右以之底寧聖策定  
則有功真儒用則無敵罔愧前哲則維汝能可特授樞  
密使兼叅知政事督視江淮京西湖北軍馬依前通奉  
大夫長沙郡開國公加食邑一千戶食實封四百戶

賜趙葵辭免不允詔勅趙葵省所奏劄子辭免兼知建康府兼行宮留守江東安撫使恩命事具悉朕觀晉人備禦北方之略大將必有定居戴淵都督六縣而鎮合肥桓冲亦督七州而鎮上明所以據形勢立根本也卿以夙望授鉞既合江淮荆楚而盡護之陪都留鑰之寄復付卿而不吝者亦晉人命戴淵桓冲意也兵事尚密卿勿多云所辭宜不允故茲詔示想宜知悉

特轉趙葵三官制門下朕倚任大臣飭嚴外治籌帷幄

而決勝夙推謨略之長錫斧鉞以視師允藉威名之重  
屬封疆之告警幸邊備之素脩遂以捷聞用寬憂顧猶  
未舉舍爵策勲之典其可稽加地進律之恩誕告朝倫  
咸聽朕命通奉大夫樞密使兼叅知政事督視江淮京  
西湖北軍馬兼知建康軍府事兼管內勸農使兼行宮  
留守江南東路安撫使馬步軍都總管兼營田使提舉  
編修經武要略權監修國史日厯同提舉編修勅令長  
沙郡開國公食邑四千三百戶食實封一百戶趙葵恢閔

而沈厚剛大而裕和識足以照萬微智足以應羣物知  
子莫若父嘗許以開濟之才事君能致身所守者精忠  
之節再踐凝密益資贊襄頃緣疆場之間慮有甲兵之  
問迨天之未陰雨如人之護風寒若思患而為之防當  
先事而為之備於時有建督之議適契予衷俾卿冠環  
樞之聯特為朕往覽觀上下流之勢激昂文武士之心  
經營孔艱處分已審此邦不足平也恃吾有以待之俄  
聞螭蜎之來敢肆虎狼之侮我衆素飽坐折遐衝王師

如飛欲賈餘勇惟事豫則立而策先定故兵應者勝而力不勞已信敵懷之威正欲解嚴之際以精誠體國厥既肯留念股肱服勤宜先懋賞是用陟三階而眡左光祿之舊陪多邑而食我公田之腴以示恩徽以隆枋任於戲在師中承天寵丕昭錫命之公鋪淮瀆修我戎嗣有還歸之喜兵事以暇而整軍容非禮不嚴必和衆而後可定功必有常而後可立武祗若子訓以圖爾成可特授宣奉大夫依前樞密使兼叅知政事督視江淮京

西湖北軍馬蕪知建康軍府事蕪管內勸農使蕪行宮  
留守江南東路安撫使馬步軍都總管兼營田使提舉  
編修經武要略權監修國史日厯提舉編修勅令長沙  
郡開國公加食邑一千戶食實封四百戶

賜趙葵辭免不允詔勅趙葵省所上表再辭免視師暮  
年特轉三官依前樞密使蕪叅知政事督視江淮京西  
湖北軍馬蕪知建康府江東安撫使行宮留守仍加恩  
恩命事具悉朕觀宣王中興之雅知召虎平淮之功當

其告成用錫爾祉寵命使蕃焉其四章曰無曰予小子  
召公是似釋者謂王欲虎無自謙損耳五章曰錫山土  
田于周受命釋者謂使受賜于岐周顯其先也至卒章  
又曰對揚王休天子萬壽是其拜命必歸美于上君臣  
俱榮朕甚慕之日泗之捷實卿勝算少遲入覲將圖爾  
成褒賞之行周邦咸喜今顧本之朝廷與士大夫之力  
自謂無赫赫之名而欲辭之謙母已過乎幕府上功已  
詔第賞俾予一人以寧亦惟汝嘉亟共朕命勿重有請



所辭宜不允

拜趙葵右丞相兼樞密使制門下有常德以立武風資  
禦侮之臣歌出車以勞還式副登庸之選迺眷機廷之  
彥久顯督鉞之雄旬宣既奏於庸公體貌聿崇於次揆  
其敷言綽以諗朝紳宣奉大夫樞密使兼參知政事督  
視江淮京西湖北軍馬兼知建康軍府事兼管內勸農  
使兼行宮留守江南東路安撫使馬步軍都總管兼營  
田使提舉編修經武要略權監修國史日厯同提舉編

修勅令長沙郡開國公食邑六千三百戶食實封一千  
八百戶趙葵忠實而疏通沈潛而剛勁鍾南嶽之英氣  
為西平之世臣仁不異遠義不辭難蚤奮經營之略文  
能附衆武能威敵允兼牧御之長勲績紀于旂常聲名  
震于草木游陪宥密深契眷知頃邊遽之戒嚴升使端  
而授任色詞慷慨毅然請行指授雍容慮無遺策盡護  
諸將于今年坐收泗上却敵之功增重江介留臺之  
地朕惟折衝在乎疆本寬民所以備邊矧將序情而閔

其勞肆因告成而錫爾祉太尉相尊等耳既久居位望之隆人傑吾能用之又何愛鈞衡之重爰立諸右式造其歸北斗神樞仍本五兵之柄金章紫綬峻躋二品之階併衍畬租特優寵數於戲及閒暇而明國政朕素定於宏謨建輔弼以成天功爾尚欽於明命必和衆乃為保大必同心斯可圖安克壯其猷祇若茲訓可特授金紫光祿大夫右丞相兼樞密使提舉國史院實錄院提舉編修國朝會要提舉編修經武要略長沙郡開國公

加食邑一千戶食實封四百戶主者施行

賜趙葵辭免不允詔勅趙葵省所三上奏辭免特授金  
紫光祿大夫右丞相兼樞密使長沙郡開國公加食邑  
食實封恩命事具悉朕以卿久勞于外延登次輔既命  
撤幕屬邊以遽告為朕少留江上指授吏士非臨機達  
權疇克爾載覽封奏知敵已遁去介圭入覲茲惟其時  
遂欲歸田何耶詩云來歸自鎬我行永久此吉甫所以  
多受祉也式遄其驅以副欽佇所辭宜不允不得更有

陳請令疾速赴都堂治事故茲詔示想宜知悉

除馬光祖沿江制置大使知建康府兼江東安撫使制  
朕疇咨舊人易畀鉅鎮召虎之經營江漢夙敏戎公畢  
公之申畫郊圻用成嘉績載加徽數式重中權端明殿  
學士正奉大夫京湖安撫制置大使兼知江陵軍府事  
兼管內勸農營田使兼夔路策應大使兼總領湖廣江  
西京西財賦湖北京西軍馬錢糧專一報發御前軍馬  
文字提領措置屯田兼京湖屯田大使武義郡開國侯

食邑一千戶食實封一百戶馬光祖剛毅近仁質直好義老略經世兼麗細之才俊識興邦該體用之學頃繇留鑰往鎮上流商畫邊籌指授將略墾田積腐之粟募兵捐燧之貲士飽而歌人百其勇惟分憂江湖之上數布喜京峴之間時嘉乃功既錫爾祉荊州控聯蜀道雖盡護西北之風寒建鄴拱衛行都宜重植東南之根本惟熟器使則履屐當惟精運掉則臂指隨頻煩元戎十乘之行益壯長江萬里之險以大經制以遠精神百姓

如慈母鞠育于懷三軍若嚴師鞭辟其側旌旗為之改  
色波濤依然安流肆陞書殿之恩華一新帥垣之風采  
噫張詠威惠相濟久渴借留之心願浩彈壓為長式慰  
邇來之望昔尹茲土今見其人克踐前猷母俾專美可  
依前正奉大夫特授充資政殿學士沿江制置大使知  
建康軍府事兼管內勸農營田使江南東路安撫使馬  
步軍都總管行宮留守節制和州無為軍安慶府郡屯  
田使加食邑四百戶食實封一百戶

開慶元年二月

賜馬光祖辭免不允二詔勅光祖省所奏辭免除資政  
殿學士沿江制置大使知建康府江東安撫使行宮留  
守恩命事具悉經營南紀久宣閫外之勞保釐東郊申  
錫師中之命卿忠忱體國俊傑識時緩帶輕裘居有邊  
籌之暇中權後勁克共武服之嚴屢奏膚公式嘉懋績  
惟荊州重地既遮蔽於風寒顧建鄴陪都宜培垣於根  
本峻升書殿增重制垣載煩戎乘之行用慰舊鎮之望  
引以自近諒復奚辭河內得恂熟知牧御之略江左有



導其究鎮重之規亟體注懷毋庸譙執所辭宜不允故  
茲詔示想宜知悉春暖卿比平安好遣書指不多及  
勅光祖省所再上奏辭免除資政殿學士沿江制置大  
使知建康府江東安撫使行宮留守恩命事具悉江左  
東南根本毗周分陝必如召公留愛甘棠庶幾重封殖  
之卿前治建鄴民習教條士知紀律易聞上流去思如  
渴今茲付卿舊鎮是還百姓以慈母三軍以嚴師拊摩  
訓督克成厥終正所望於卿又何辭焉所辭宜不允不

得再有陳請故茲詔示想宜知悉春暄卿比平安好遣書指不多及

獎諭馬光祖賜金幣鵬張之寇肆擾江濱卿始則啟元乘以征行繼復集舟師而赴援恤鄰之誼固宜爾而體國之念殊可嘉因任進職已示褒寵復頒金幣用旌爾勞至可領也

景定元年四月二十六日

授馬光祖資政殿大學士制勅朕儀圖江閩申命制臣比援上流嘗藉濟師之力茲敷大號用陞顧問之班仍

專斧鉞之權因任藩垣之寄丕昭寵渥載錫贊書資政  
殿學士正奉大夫沿江制置大使知建康軍府事兼管  
內勸農營田使江南東路安撫使馬步軍都總管行宮  
留守兼節制和州無為軍安慶府三郡屯田使金華郡  
開國侯食邑一千四百戶食實封二百戶馬光祖強毅  
而端方宏深而肅括志存社稷固將左執弭而右屬橐  
令稟朝廷用能晨受命而夕就道往返風濤之上驅馳  
兵革之間靡憚其勞率先以往當彼寇披猖之甚適我

兵調遣之艱曲盡乃心無落吾事爰肆放於褒賞庸懋  
獎於忠勤加隆名於一字之榮仍寵任以六師之重以  
酬前績以勵後圖噫股肱宣力四方身雖居於閭闔君  
臣相須一體心毋遠於闕庭勉對恩徽益思報効可依  
前正奉大夫特授充資政殿大學士沿江制置大使知  
建康軍府事兼管內勸農營田使江南東路安撫使馬  
步軍都總管行宮留守兼節制和州無為軍安慶府三  
郡屯田使時暫兼淮西總領金華郡開國侯加食邑四

百戶食實封一百戶

賜馬光祖辭免不允詔勅光祖省所奏辭免除資政殿大學士仍舊任恩命事具悉陪都為經營四方之根本中興以來如浚如俊鄉皆以元勲碩輔再鎮撫是邦草木知其威名敵人不敢起飲江之想頃上流之備不戒騎塏漲于滸黃至勤宰臣擐甲督戰一洗而清之卿累月驅馳上下勞績用懋所調麾下將士亦屢以得雋開幕府上功炳如也進書殿之鴻名仍閫府之舊寄見知

而悅疇不謂宜巽章引避曾是以為榮乎夫師以氣為主以直為壯今我之氣直且壯矣勉圖常武之功嗣對遄歸之寵所辭宜不允故茲詔示想宜知悉夏熱卿比平安好遣書指不多及

御札獎諭馬光祖築宜城勅光祖古舒與秋浦相望一衣帶水昔人所謂風寒處也移治以來雖建立官吏而蕩無堡障民有搖心或請板築宜城而守之議久不決屬者丞相行邊采其策卿以制閫任其事且佐其費向

之荒墟今為堅壘設敵南來猝攻之不能克欲舍之深入則懼吾金湯之擬其後此國家以淮西三郡隸昇閬之初意也竣事來告忠勞至矣予嘉乃績寤寐歎賞卿其益恢遠略以紓予北顧之憂故茲獎諭想宜知悉春寒卿比平安好遣書指不多及

景定二年三月

特轉馬光祖光祿大夫制經始不日而成閬帥幹方之略有功見知則說公朝勵世之規眷言藩屏之賢能設金湯之險肆盼寵數式獎勛庸資政殿大學士正奉大

夫沿江制置大使知建康軍府事兼管內勸農營田使  
江南東路安撫使馬步軍都總管行宮留守兼節制和  
州無為軍安慶府三郡屯田使時暫兼淮西總領金華  
郡開國公食邑二千三百戶食實封四百戶馬光祖挺  
文武之全才膺安危之重寄當鐵騎倏游魂而至佩玉  
麟分方面之憂樽俎折衝屹若蔽遮於近甸樓船下瀨  
隱然掎角於上流迨邊祲之肅清贅廟謨之恢拓自舒  
移治有郡虛名至煩竹符之親臨決就宜城而改築難



與慮始昔嗟作舍之莫成知無不為今有制垣之任責  
二紀之荆榛蔽野一朝之雉堞連雲滌滿皖之氛埃生  
蘄黃之氣勢倅圖來上宵旰頓寬其疊進於穹階以顯  
旌於殊績噫長江號天塹卿其護腹背之風寒聖人有  
金城朕方賴股肱之忠力益閱規畫以副眷懷可特授  
光祿大夫依前充資政殿大學士沿江制置大使知建  
康軍府事兼管內勸農營田使江南東路安撫使馬步  
軍都總管行宮留守兼節制和州無為軍安慶府三郡

屯田使時暫兼淮西總領金華郡開國公加食邑四百戶食實封一百戶

賜馬光祖辭免不允詔勅光祖省所再上奏辭免任責浚築宜城特轉兩官仍令學士院降獎諭恩命事具悉賞以勸勞國之盛典矧宜城板築就緒遂為江南一障蔽厥勞茂矣勸獎其可已乎巽牘洊騰備見謙挹雖曰宰臣之指授亦惟閫制之經營二等進官受之奚過亟祇成命勿復有言所辭宜不允不得再有陳請故茲詔

示想宜知悉春寒卿比平安好遣書指不多及

御札又賜馬光祖卿忠勤一節中外具知長江天塹賴以安妥前歲之援上流舊歲之築宜城又近績之最著者朕甚嘉之游覽來奏欲釋閭寄非朕所樂聞也增秩甫新倚重正切願毋遐心嗣對光寵

景定二年

授馬光祖觀文殿學士制勅制垣底績聿觀三載之成書殿冠班昭示四方之勸誕頒異數深聳具瞻資政殿大學士光祿大夫沿江制置大使知建康軍府事兼管

內勸農營田使充江南東路安撫使馬步軍都總管行  
宮留守節制和州無為軍安慶府三郡屯田使時暫兼  
淮西總領金華郡開國公食邑二千六百戶食實封五  
百戶馬光祖識遠而氣宏道周而業鉅天機錯綜冰壺  
玉鑑之高明學力雄渾泰山喬嶽之負載能應則五官  
之並用盡忠則一髮之不欺京師衆大之居每思前尹  
金陵六朝之舊爰重中權逮往撫於荆襄久宣勞於江  
漢視儀政路式表儒猷趙抃一琴累疏欲歸廉范五袴

陪都懷舊宵旰倚寬於憂顧風濤靡憚於沂公賁然重  
臨惠此四履鄆於冀如制水坐屹勝形晉及楚其餘波  
具有遠烈方且設險守國造舟為梁青鐵鑄兵黃金募  
士或偃息或燕樂予拮据子蓄租既消騎火之紅正念  
玉關之老効式臻於久任職乃錫於隆名紫宸地殊非  
但序遷之寵金城日壯尚惟柄用之圖繫我譽髦對揚  
休命可特授觀文殿學士依前光祿大夫沿江制置大  
使知建康軍府事兼管內勸農營田使充江南東路安

撫使馬步軍都總管行宮留守節制和州無為軍安慶  
府三郡屯田使時暫兼淮西總領金華郡開國公加食  
邑四百戶食實封一百戶

手詔獎諭馬光祖勅光祖鄉前自渚宮重臨江閫荏苒  
三載勤勞百為援枹鼓以犄角上流之師悉賦輿以板  
築宜城之壘蒐卒補逃亡之虛籍散金募遊擊之健兒  
金鑠綠沉森羅武庫蒙衝鬪艦照映怒濤凡皆軍中節  
縮之贏靡煩公上拋降之助知鞠躬而盡力不矜能而

伐功載嘉元戎衛社之忠深得大臣體國之誼賜璽書而褒美佇袞繡之來歸故茲獎諭想宜知悉冬寒卿比平安好遣書指不多及

景定二年十月二十五日

第二次除馬光祖沿江制置大使知建康府江東安撫大使行宮留守制勅朕簡求近弼重鎮陪京念昔全江淮以濟中興允資碩望矧今崇詩書而謀元帥詎捨舊人起之田間付以居守爰䟽茂渥申錫贊書觀文殿學士光祿大夫提舉臨安府洞霄宮金華郡開國公食邑

三千七百戶食實封七百戶馬光祖器偉量闊資凝猷  
遠炳著龜之先見凜松栢之後凋方叔元老克壯其猷  
歷蕃宣於四國君陳嘉謀入告爾后嘗唯諾於一堂頃  
以蓋臣洊分江閩投鞭欲渡有颶回霧塞之顯憂杖鉞  
以先助霆擊電掃之勝勢威名猶在誼槩可嘉朕慨念  
留都控扼天塹雖千羣奚用已屹立金湯之形然一物  
不牢敢少怠衣衾之戒孰寬憂顧無若老成兵將素服  
其拊循民吏夙安其條教龍盤虎踞山川不易於鎮臨



魚鑰麟符麾幟一新於號令以壯外攘夷狄之畧以恢  
北定中原之規噫抃以清脩固再臨於益部琦以勲輔  
尚三典於相臺勉企前脩益光賢業可依前觀文殿學  
士光祿大夫特授沿江制置大使兼知建康軍府事兼  
管内勸農營田使兼江南東路安撫大使馬步軍都總  
管兼行宮留守節制和州無為軍安慶府三郡屯田使  
食邑實封如故

景定五年四月

賜馬光祖辭免不允二詔勅光祖省所奏辭免依舊職

除沿江制置大使兼江東安撫大使兼知建康府恩命  
事具悉維今江閩內護留都每輒將相大臣往任保釐  
重寄卿碩膚厚德典刑宿儒其威名荐著於鎮臨其惠  
澤素覃於牧守茲謀元帥毋踰老臣昔黃霸潁川前後  
八年而愈治郭伋并部兒童數百以來迎成命既頒彼  
民大悅人惟求舊初何惜於重臨事不辭難亦胡為而  
多遜所請宜不允故茲詔示想宜知悉春暄卿比平安  
好遣書指不多及

景定五年四月

勅光祖省所再上奏辭免依舊除沿江制置大使兼江  
東安撫大使兼知建康府行宮留守恩命事具悉己丑  
詔書諭卿至矣胡猶未孚朕意昔臣仲淹事我仁祖於  
再撫陝西之日有驚破賊膽之謠顧今秣陵為國鉅鎮  
表淮裹江而分閫所賴折衝中權後勁之得人孰若圖  
舊是用起卿家食司鑰陪都若夫遮蔽風寒之規摹綢  
繆牖戶之知略駕輕就熟固饒為之母但以膂力既愆  
辭速就國可也所辭宜不允不得再有陳請故茲詔示

想宜知悉春暄卿比平安好遣書指不多及

景定五年四月

乙丑賜馬光祖丐祠不允三詔勅光祖省所奏乞畀叢祠事具悉卿曩事先帝為股肱臣簡注不忘起之家食重付北門之管屹為長江之防曾未幾時龍湖僊去所留以遺子冲眇者一二臣外尤藉卿以寬顧憂焉昔人有卧摠留臺者豈得遽以疾諗乎如云滿歲漸欲引年茲固未可爾其體眷倚益懋壯猶是亦卿所以報先帝之遇也所請宜不允故茲詔示想宜知悉夏熟卿比平

安好遣書指不多及

四月

勅光祖省所奏乞畀祠廩以便養病事具悉維周之隆  
率東諸侯者以六師申豫防之戒報誥則曰爾身在外  
心在王室上下交修用答揚光訓訪予落止亦惟股肱  
宣力之臣追先帝殊遇治于閒暇之時作周匹休卿有  
方叔克壯之猶膺畢公保釐之寄以國為家以民為身  
其可屬負茲而忽徹桑土商飈寢勁江防為先惜分陰  
以護風寒精神折衝徒得卿重從容裘帶斯可養恬無

棄爾成懋乃攸績所請宜不允故茲詔示想宜知悉夏  
熟卿比平安好遣書指不多及

六月

勅光祖省所再上奏乞祠廩事具悉周經營江許必召  
伯之有成漢餉餽關中惟鄴侯之專屬師旅以暇而整  
威惠以久而孚卿雖三命於居留今甫踰年之宅牧我  
戍未定靡歸聘寧不永懷舊人遠省知若勤豈宜易退  
閫寄不可數易疆事母恃不來與其慕赤松之從游孰  
若勉干木之偃息曷為游奏未燭予衷不剛不柔而德

修足食足兵而民信典聽朕必圖功攸終所請宜不允  
不得再有陳請故茲詔示想宜知悉秋熱卿比平安好  
遣書指不多及

御札獎諭馬光祖提師應援覽奏以寇迫舒城元戎銳  
於一出忠忱為國威聲懍敵諸將有所倚賴事功何患  
不集予甚嘉之安慶城高池深固無足慮萬一有窺江  
之謀則豫防力遏必使無透漏乃可切宜勉旃庶寬憂

顧咸淳元

年八月

丙寅賜馬光祖丐祠不允二詔勅光祖省所奏乞畀叢祠事具悉卿以文武威風三尹陪京江潯經營厥功茂焉召伯有成王心則寧朕用寬北顧之憂采薇出車之勤瘁靡日忘之今天塹雖既清而陰雨之防不可忽迨我暇矣建威銷萌繫卿是賴其可謂事幾皆來而圖田里之安處謹護風寒惟卿遠慮無忘于恤成乃圖功亦惟舊人不克遠省昔元祐初留籥洛師者未釋位詔喻之曰視國如家忠臣可以忘年卿年至未也勉為國計



勿復懷歸所請宜不允故茲詔示想宜知悉春寒卿比  
平安好遣書指不多及

正月

勅光祖省所再上奏乞畀叢祠事具悉朕聞任賢責成  
者悠久而不易體國經遠者華皓而益堅角巾東第之  
言未聞羊祜之從欲卧護北門之寄豈曰裴度之辭勞  
矧卿克壯其猶盍思不解于位者壽俊在服詎宜止足  
之謀樽俎間折衝奚必驅馳之役儻使卿遂山林之志  
孰為朕分疆場之憂無踰老臣罔或自介用逸所報先

帝亦惟以救圖功所請宜不允不得再有陳請故茲詔  
示想宜知悉春寒卿比平安好遣書指不多及

景定建康志卷三